



**Kalaallit Nunatsinni silaannaap allanngoriartornera pillugu periusissiamik pisariaqartitsineq pillugu apeqquteqaat aallaavigalugu oqallinnissamut siunnersuut. Silaannaap pissusaata allanngoriartornera pillugu periusissiornikkut periusissiaasimasut sammisat ilaasa maannakkumut naapertuuttut katersorneqarsinnaanerata pillugu apeqquteqaat aallaavigalu oqallisissiaq.**

(Inuit Ataqaatigiit, Inatsisartunut ilaasortaataat)

Ullumikkut annertutigisumik gasinik silaannarmik kissatitsisartunik aniatitsiinnassagutta, 2100-mi imavissuit 1 meterimik qaffariarsinnaasut FN-ip klima pillugu ataatsimiittartui IPPC 2019-mi septembarimi immikkut nalunaarusiami inerniliivoq. Tamanna nunarsuarmut tamarmut nutaarsiassatsialaanngilaq, ingammilli nunarsuup innuttaasa 20 procentiinut qeqertaaqqani nunani pukkitsuni annertuumik sissalinni sermilluunniit aattut qanittuini najugaqartunut. 1 Sineriammi, qeqertaaqqani issittumi qaqqanilu portusuuni inuiaqatigiit najugaqartut ingammik immap sermillu allanngoriartornerannik, immap qaffakkiartorneranik, ulerujussuarterneranik sermillu nungukkiartorneranik nassataqartunik eqqorneqarsinnaasarput. Sinerissami sermip annikilliartrornera siornatigornit annertunerujussuannortoq paasineqarpoq. Sermeqarfiit taakku qaleraleqarfiupput. Sermeq immamut iigartarunnaarluni nunamut millilluinnarnermigut annguppat imaani sermip sinaani uumasoaqatigiiaanut sunniuteqartussaavoq. Sermimmi aannera ullumikkut imaani nerisareqatigiinnermut toqqammaviuvoq, assersuutigalugulu qaleraleqassutsimut pitsaasuulluni, tamannalu sermip killingani qaleraleqarfinnik nassaartarnitta aamma patsisigilluinnarpaa. CO2-mik aniatitsineq silaannaallu agguaqatigiissillugu kissarnerulerneranik immap kissarnerulerneranik pilersitseqataavoq. Imaq kissakkaangami CO2-mik tigooraasinnaassusaa annikinnerulersarpoq, tamannalu silaannaap CO2-qassusaanik annikillisaasinnaaneranut annikinnerulersitsisarpoq. Silaannarmili CO2-p annertusiartornerata imavissuit ullumikkornit CO2-mik akoqarnerulernerat nassatarissavaa, tamannalu immap searnarnerulerneranik aamma malitseqassaaq. Taamaattoqarnerata immap uumasoaqassusaa naasoqassusaa akornusissavaa, naggataagullu aamma inuit aalisarnermik pinngitsuuisinnaanngitsut eqqorneqassapput. Taamaammata silaannaap allanngoriartornera inuiaqatigiinnut tamanut, inunnt, nerisareqatigiinnut, inuussutissarsiortunut, inissianut minnerunngitsumillu inuiaqatigiit inuuniarnerminni toqqammaviinut annertuumik sunniuteqarput. Silaannaap pissusaata allanngoriartornera nunap 1 <https://www.ipcc.ch/srocc/chapter/summary-for-policymakers/> 2 inoqqaavisa kulturiisa inuusaasiisalu attatiinnarneqarsinnaanerannut annertuumik pingaarutilimmillu sunniuteqartussaavoq. Tamakku tamarmik unammilligassaatillugit nunarput ataatsimoorussamik klimamut periusissiaqalernissamut pisariaqartitsinnginnerluni?



partii naleraq

Kalaallit Nunaat 2016-mi nunarsuarmioqatigiit klima pillugu isumaqatigiissutaannut – Parisimi isumaqatigiissummut – ilaassanani aalajangerpoq, ilaatigullu Parisimi isumaqatigiissummi nunap inoqqaavisa aningaasaqarnikkut ineriartornissamik eqqummaariffeqannginnera tunngavilersuutigineqarpoq. Kalaallit Nunaat Parisimi isumaqatigiissummut tapersersueqataassasoq kissaatigaarput. Taamaamallu ima aperisariaqarpugut: Kalaallit Nunaat Parisimi isumaqatigiissummut atsioqataassariaqannginnerpa? Silaannaammi allanngoriartornerata nunat killeqarfii apeqqutaatinngilai. Kalaallit Nunarput akisussaaaffimmik tiguseqataasariaqarpoq. Naalackersuisut assigiinngitsunik pingasunik aalisarnermik piniarnermillu inuussutissarsiornermi silaannaap pissusaanut nalimmassarnissamik aallussisumik, umiarsuakkut angallassinert silaannaallu allanngoriartornera kiisalu nunalerinermik inuussutissarsiornermi silaannaap pissusaannut nalimmassarnissamik imaqartunik saqqummersitaqarnerat Inuit Ataqtigiit ilisimaaraat. Taakku 2012-p 2017-llu akornanni suliaapput. Naalackersuisulli silaannaap pissusaanut nalimmassarneq pillugu nassuiaatai naammappat? Suliniutit taakku immikkoortuni allani silaannaap pissusaata allanngoriartornera pillugu ilisimasanik nutaanerpaanik toqqammaveqarluni aallunneqartariaqartunik tikkuussisuni ataqtigiissarneqarsinnaannginnerpat? Innuttaasut inuussutissarsiutinillu ingerlatsisut ilaat amerlaqisut silaannaap pissusaata allanngoriartorneranik malunnaatilerujussuarmik eqqugaapput. Taamaattoqarnerata Inatsisartut Naalackersuisullu partiinit suminngaanneernertik eqqarsaatiginagu aaqqiissutissanik nalimmasaatissanillu nassaarniarlutik sulinissaannik pisariaqartitsineq annertunerulersinnginnerpaa? Taamatut suliaqarnermi aamma inuussutissarsiutinik nutaanik allanik nassaarniarneq ilanngunneqarsinnaavoq. Kalaallit Nunaata silaannaap pissusaata allanngoriartornera pillugu periusissiaa inuussutissarsiutinik nutaanik taakkuninnga sanarfinermut pitsaanerpaamik ikorfartuisuusannginnerpa? Kalaallit Nunaata silaannaap pissusaata allanngoriartornera pillugu periusissiaa inuussutissarsiutinik suliniutit avataasigut sunik allanik aamma aallussiffiusinnaava?